

J E N E S I S,

NITAASVIITAI UHUP IS AGED A MOSES.

NUARIN TAS ALUPAS 1.

1 Natupun u nohatag im nobohtan, 3 inlah, 6 nauanohatag, 9 inpece im injap, 11 er ika yi ededel itai an nobohtan, 14 nagesega, im inmohoc, im niiji moijeuv, 20 num u im inman, 24 niiji itai eklim edo irai pece, 26 natimi an nalmui Atua. 29 Er ati nitai hegaig.

Is ago nohatag a Atua im nobohtan itu acen.

2 Is tup upudupud nobohtan, um ti itai iran; is ataluopni narasin jap napat. Is aibuthan wai a Nesgai Atua.

3 Is ika a Atua, Etmu eteuc inlah: is um lah.

4 Is almoi inlah a Atua, mika is upene: is atiakoai inlah im napat a Atua.

5 Is anvi nidan lah a Atua par ika Nadiat, um lep anvi nidan napat par ika Nepig. Is adiat uhup injupura im nuhialeg.

6 Is ika a Atua, Etmu eteuc nuarin lah juju irai iblai wai, par atiakoai wai.

7 Is ati nuarin lah a Atua, um atiakoai wai ithan nuarin lah im incopda u nuarin lah ijinies: is umuce.

8 Is anvi nidan nuarin lah a Atua par ika nauanohatag. Is adiat sekunt injupura im nuhialeg.

9 Is ika a Atua, Uhm u asjapicnaig niiji wai ithan nohatag an

nuarin yi ethi ache, etmu lep ateucrad nobohtan: is um uce.

10 Is anvi nidan nobohtan a Atua par ika Inpece; is lep anvi nidan nasjapicnaig ui wai aien par ika Injap: is almoi a Atua mika is upene.

11 Is ika a Atua, Etmu ededel nefelelicai an nobohtan, im inceslum amen nesgan iran, im nauicai yi pinid nohuu nohwan, et lep amen numta iran: is um uce.

12 Is ededel nefelelicai an nobohtan, im inceslum amen nesgan iran, im nauicai is pinid nohuu nohwan, is lep amen numta iran: is almoi a Atua mika is upene.

13 Is adiat dirt injupura im nuhialeg.

14 Is ika a Atua, Etmu eteuc niiji itai lah an nohatag par atiakoai nadiat im nepig; um asjaaicnaig irai iji opan, im niiji lidiija, im niiji adiat, im niiji mesese:

15 etmu amen itai lah iji igki an nohatag va yi pu lah nobohtan vaig: is um uce.

16 Is ago nitai lah alupas is ero a Atua; nitai lah esjilid uri nadiat, im nitai lah haklin uri nepig: is lep ago moijeuv aien.

17 Is ikni an nohatag a Atua mika yi lah nobohtan vaig.

18 um lep esjilid an nadiat, im nepig, um itai atiakoai inlah im

JENESIS, 1, 2.

napat: is almoi a Atua mika is upene.

19 Is adiat ford injupura im nuhialeg.

20 Is ika a Atua, Etmu eteuc niiji obotpot itai umumoh an jap um ahinag, im niiji obotpot man ijinies an nauanohatag.

21 Is ago niiji yau alupas a Atua, im niiji obotpot itai umumoh an jap is ahinag, im niiji obotpot man ae: is almoi a Atua mika is upene.

22 Is tas upene vaig a Atua, um ika, Etmu ectaig numu um ahinag, um ohua injap vaig, etmu lep ahinag niiji man an nobohtan.

23 Is adiat fifd injupura im nuhialeg.

24 Is ika a Atua, Erumu amen an nobohtan niiji obotpot itai umumoh, nikavaig, niiji itai eklim edo irai pece auata upene, im niiji obotpot itai atahas, im niiji obotpot itai eklim edo irai pece aleg: is um uce.

25 Is ago niiji obotpot itai eklim edo irai pece aleg a Atua, im niiji obotpot itai eklim edo irai pece auata upene, im niiji obotpot itai atahas an nobohtan: is almoi a Atua mika is upene.

26 Is ika a Atua, Intaijmu ago natimi an nalmuitaij akataij yi idivaig cataij: erumu esjilid ara irai iji mu an jap, im niiji man an nauanohatag, im niiji itai eklim edo irai pece auata upene, im niiji itai atahas asega et atahas an nobohtan, im nobohtan asega.

27 Is ago natimi a Atua an nalmun, is ago yin aien an nalmui Atua; is ago rau aien natamaig im natahig.

28 Is acis yi alwai rau a Atua, is ika ehele rau a Atua, Arumu asvalav aijaurau yi ahinag, erumu terimterim ara an nobohtan, um atimarid iran: erumu esjilid ara irai mu an jap, im niiji man an nauanohatag, im niiji itai umumoh asega et amen an nobohtan.

29 Is ika a Atua, Ek mun idim alupai cauran ainyak niiji obotpot ceslum asega an nobohtan asega, et amen nesgan iran, im niiji obotpot cai oho asega et amen nohwan iran; inyi itai hegaig incamia nitai iji igki.

30 Ek mun lep alupai itai eklim edo irai pece umumoh asega ainyak nefelelicai asega et ededel incara, im inman an nauanohatag asega, im niiji itai atahas asega an nobohtan: is um uce.

31 Is almoi niiji itai asega a Atua is ago aien, mika is idim upene: is adiat siksd injupura im nuhialeg.

NUARIN TAS ALUPAS 2.

1 *Nadiat atumop uhup. 4 Nago vaig itai. 8 Er ago nahapol Itena, 10 im nofowai iran. 17 Er atapnes incal er ato itai vaig. 19, 20 Et anvi nidai niiji itai umumoh asega a Atam. 21 Et ago intakata a Atua, um ati natmehgan.*

1 Eris ago ehni nohatag im nobohtan, im niiji itai asega amen iran is uce.

2 Is ago ehni nauritai o un a Atua, ja par lahlah an nadiat sevend; is atumop aien an nadiat sevend va niiji auritai asega is ago aien.

3 Is acis yi alwai nadiat sevend a Atua, um ika yi itap: is idim atumop iran a Atua va niiji auritai asega is atupun aien um ago.

4 **I**S um uce nago vaig nohatag im nobohtan an nopan iyehki is ago nobohtan im nohatag a Ihova Atua uja,

5 im lep nahtaicai asega an nobohtan an nopan iyehki is pam eti eteuc an nobohtan, im inceslum asega an nobohtan an nopan iyehki is pam eti ededel: is pam eti ati incopda an nobohtan a Ihova Atua uja an nopan iyehki, is ti tah natimi par auritai an nobohtan.

6 Ja is ahes inmoso an nobohtan um aridjai, um opoh nobohtan asega.

JENESIS, 2, 3.

7 Is leh nuarin nobohtan a Ihova Atua uja um ago Atam iran, um ahlai immun gidjin; is um umoh a Atam.

8 Is ago nahapol a Ihova Atua uja Itena an ridjai o un; is ati eahki aien natimi inig is ago aien.

9 Is ika a Ihova Atua uja, Etmu ededel an nobohtan niiji obotpot cai asega inyi upene nalmoi vaig, um upene incaig vaig; im lep nauincai umumoh vaig juju anliin nahapol, im nauincai uhpu ato nitai upene vaig im nitai has.

10 Is ahes Itena nofowai um ahec pan u nahapol; is atiakoai um for nauiwai iran.

11 Nidan nofowai uhup Paison: et arehed mihtag an pece Havila asega, et amen colt eahki;

12 et esjilid colt an pece iyehki: etamen eahki telyum im inhat oniks.

13 Im lep nidan nofowai sekunt Caihon: et arehed mihtag an pece Idiopia.

14 Im lep nidan nofowai dirt Hitekkel: et yah an nahaijin Asiria an ridjai o un. Im lep nidan nofowai ford Yufretes.

15 Is leh Atam a Ihova Atua uja, um ati yin u nahapol Itena, mika yi ahapol iran aien um aminjinaig.

16 Is tas alep ehele Atam a Ihova Atua uja, um ika, Namu tup hegaig nohwaicai asega aiek an nahapol:

17 jam jim caig nohwancai er atō nitai upene im nitai has vaig: napu idim mas aiek an nadiat inig an caig aiek.

18 Is ika a Ihova Atua uja, Et eti upene vai Atam nechim amen vaig; ekpu ago natimi atau imi yin ainyak.

19 Is ago niiji itai eklim edo irai pece asega an nobohtan a Ihova Atua uja, im niiji obotpot man asega an nauanohatag; is imiapan ra ehele Atam aien mika yi anvi ni-

dara aien: is anvi nidai niiji itai umumoh asega a Atam.

20 Is anvi nidai niiji itai eklim edo irai pece auata upene asega a Atam, im niiji man an nauanohatag, im niiji itai eklim edo irai pece aleg asega; ja is pam eti eteuc tah par atau imi Atam.

21 Is ika a Ihova Atua uja yi umjeg asega a Atam, is umjeg aien: is atipagki neduon ritin is ethi aien, um lep adgai iran;

22 is ago natahig a Ihova Atua uja an neduon ritin is atipagki aien irai Atam, is imiapan yin ehele Atam aien.

23 Is ika a Atam, Neduon an neduok nigki, im nohun an nohuk: uhmu anvi nidan par ika natahig, vaig inig nikavaig, eris atipagki yin an natamaig.

24 Va nitai inigki etmu udei etman im risin a natamaig, um amen se ehele ehgan: etmu ethi ache nohurau arau.

25 Erus tup atga a Atam im ehgan, ja erus eti ehcamai arau.

NUARIN TAS ALUPAS 3.

1 Et ahiyek Iva a ninyeuv. 6 Erau eropse a Atam im Iva um ehcamai vaig. 9 Et atijai itai ira rau a Atua. 14 Neruwaig irai ninyeuv. 15 Intas upyi asaig vai Kristo. 16 Neruwaig ira atimi. 21 Nitai aso atimi uhup. 22 Nahlo pan itac Atam im Iva.

IS esjilid narapakau u ninyeuv irai iji itai eklim edo irai pece asega is ago a Ihova Atua uja. Is ika a ninyeuv ehele intakata, Is idim ika a Atua, Arumu jim hegaig nohwaicai asega anliin nahapol aijaurau; ka o'o?

2 Is ika a intakata ehele ninyeuv, Et eti itap vai cumrau inhegaig vaig nohwaicai anliin nahapol:

3 ja is tas a Atua va nohwancai juju anliin nahapol, um ika, Arumu jim caig aijaurau, um jim ubli, va aru jim emesmas aijaurau.

4 Is ika a ninyeuv ehele intakata, Aru idim eti emesmas aijaurau:

JENESIS, 3.

5 et idim ato a Atua mika, uhpu asalgei nesganimtamirau an nopan inig aru caig aijaurau, arupu idivaig Atua aijaurau, par ato nihi itai upene im nihi itai has.

6 Is wat almoi nohwancai a intakata, mika is upene incaig vaig, um upene acen nalmoi vaig, im lep nohwancai upene va uhpu arapakau vaig, is leh nohwan aien, um caig, is lep alayi natamnyu un aien ; is um caig aien.

7 Is um asalgei nesganimtarau, erus ato arau mika *erus* tup atga arau ; erus atij neri nateg arau, um ago inlepei imi rau.

8 Erus atahaijeg nohrai Ihova Atua uja arau anliin nahapol an jupki : is atpuh a Atam im ehgan uicai an nahapol vai Ihova Atua uja.

9 Is ahlaig vai Atam a Ihova Atua uja, um ika ehelen, Aiek *ak* eda ?

10 Is ika aien, Ek mun atahaijeg nohram ainyak anliin nahapol, ek mun imtitai euc ainyak vai intup atga unyak ; *ek* mun atpuh ainyak.

11 Is ika ehelen aien, Et mun asaig ehelum a di mika na tup atga aiek ? Na mun caig nohwancai aiek kis tas alep vaig ainyak, um ika, Namu jim caig aiek, ka o'o ?

12 Is ika ehelen a Atam, Is alaak nohwan a intakata as ati yin aiek mika yi amen ehelek aien ; ek mun caig ainyak.

13 Is ika a Atua ehele intakata. Inhe nigki na mun ago aiek ? Is ika a intakata, Et mun efaifa vai nyak a nimyeuv, ek mun caig ainyak.

14 Is ika a Ihova Atua uja ehele nimyeuv, Napu has esjilid aiek va nedo inigki, irai iji itai eklim edo irai pece auata upene asega, im lep nihi itai eklim edo irai pece aleg asega ; napu atahas aiek an nobohtan, um caig nobohtan irai iji adiat :

15 ekpu lep ati namcel jipe vai euc im intakata ainyak, im lep vai ilpu hal unyum im inhal o un ; etpu

ehtoplec nidjinum aien, ja napu ehtoplec nijinalak an neduon aiek.

16 Is ika ehele intakata aien, Etpu idim esjilid nohocred unyum an napos vaig ilpu hal unyum ; napu apos ilpu hal unyum aiek um ohocred ; *napu* upoupo aiek irai natamnyu unyum, etpu esjilid iram aien.

17 Is ika ehele Atam aien, Etpu has nobohtan va nedo unyum ; nikavaig, na mun atahaijeg intas o ehgam aiek, um caig nohwancai inig kis tas alep vaig ainyak, um ika, Namu jim caig aiek : napu ohocred aiek irai iji adiat va nitai caig incam ;

18 etpu ededel nihi itai upun-upun im nefelelicai has vai euc napu lep hegaig inceslum an nobohtan aiek ;

19 napu ihlup aiek va nitai caig incam, um yetpan an nopan iyehki napu lep adumoij pan an nobohtan aiek ; as ahes an nobohtan aiek ; na idim obohtan aiek ; napu lep adumoij pan an nobohtan aiek.

20 Is anvi nidai ehgan a Atam par ika Iva ; is idim risi atimi asega aien.

21 Is ago nitai aso Atam im ehgan a Ihova Atua uja ira arasi itai eklim edo irai pece, um aso rau iran.

22 Is ika a Ihova Atua uja, Almoi Atam, et ika aien yi idivaig cataij par ato nihi itai upene im nihi itai has : kit etpu lep ada nikman aien im leh nohwancai umumoh vaig, um caig, mika yi umoh irai iji mesese :

23 va nitai inigki is ahlo pan itac yin a Ihova Atua uja anliin nahapol Itena, mika yi auritai aien an nobohtan inig is ahes iran aien.

24 Is ahlo pan itac Atam aien ; is ati ohwat Jerub is ero aien an nahaijim Itena an ridjai o un, im lep nautoga cap is ae sjipe par atapnes nefalaig yetpan u nauincai umumoh vaig.